

INYENE EKE SPIRIT

Isaiah 58:1-14

ỌYỌHỌ UKPEP-ŃKPỌ 368

Eke Mkparawa

IKỌ IBUOT: “Yak Jehovah onyũ adat fi esit; ndien enye eyenọ fi se esit fo oyomde” (Psalm 37:4).

Mkpañ-Utoñ

Ke ini Isaiah, anditiñ ntiñ-nnim ikọ ọkọdọhọde ete, “Menere uyo fo nte ukorowo, enye oro ọkọwọrọ ete “furi obukpoñ”, me “fiori mkpo.” Obukpoñ esikot owo ete enọ mkpañ-utoñ. Ke ekọñ, uyo esie esidemere owo-ekọñ ke idap ke usen-ubọk; etop efen asian enye abañā eridi mme asua, ñko etop efen ọwọrọ “nime ikañ” ke añwa mbon-ekọñ; esifuri efen ke mben udi mbon-ekọñ.

Nso idi ntak emi Isaiah okoyomde ndifuri “obukpoñ”? Enye ekenyene mfighe ke esit abañā mme Jew onyũ oyom ndimen mme idiok-ñkpọ mmọ ñwut mmọ. Nte ata ediwak owo mfin, mmọ ekewut idem ndidi se mmọ mikedighe. Mmọ ekewut enyọñ-enyọñ edinam edi enana edisana-ido eke esit idem. Mmọ ekemehe ke ndinim mme usọrọ ukpono Abasi, edi esit mmọ ekeyọhọ ye ibak.

Akam Ye Utre-udia

Mmọ ekeboñ akam kpukpru usen enyũ ewak nditre udia. Mmọ ekekere ete ke akpanikọ ke Abasi eyekop akam mmimọ. Ke ini emi Jesus okodude ke isọñ, ndusuk owo ema esikpuhọre iso mmọ ke ini mmọ etrede udia, enyũ etie nte edu ke mfuhọ. Jesus okokot mmọ mbon mbubik. Enye ọkọdọhọ ete ke ini mme owo etrede udia, mmọ ekpenyene ndiyet iso mmọ nnyũ ndomo nditie nte mmọ itreke udia. Ete emi odude ke Heaven edi Enye emi ọdiọñde ke ini anditiene-Christ etrede idem esie udia onyũ abiatde ata anyan ini ke akam. Inaha nte owo efen ọdiọñ.

Ke ini Abasi odoride owo saña-saña mfighe akam ke esit ke abañā ñkpọ ekededi, akpana enye etre udia. Ndusuk ini mfighe ke esit owo oyom usọp-usọp akam abañā owo emi ọdọñde me owo emi mibọhọ erinyaña, ndien oruk owo oro isikereke ibaña udia. Akpan ñkpọ edi ndinam enye ke ofuri esit ye ke ntak ubọñ Abasi ikpọñ, idighe ndinem owo esit.

Isaiah ọkọdọhọ mme Jew ete “Mbufo ekutre udia kpa nte ke mfin emi, ke enam ekop uyo mbufo ke enyọñ.” “Mme edi nte enye otopde ibuo ete nte nnyanyaña, onyũ ebride ọfọñ-ikpo ye ntan ana ke esit?” Isaiah ọkọdọhọ ete ke ata edikpono Abasi ọkọñde ke ndiñwam mmọ emi ebiomde ndodobi mbiomo, ndino mmọ emi ọbiọñ ọdọñde udia, ndiñwam mme ubuene, ndifuk mme asaña iferi ọfọñ ndinyũ ñwut mbọm ye mfọnido. Enye ete ke emi okpon akan eke ebọñde man ekop uyo.

Owo ekeme ndidi ke enyin usuñ fo, emi miyomke udia ikpọñ ndidia, edi oyomde ndifiok mbaña Eti-mbuk. Tiñ ikọ Abasi nọ enye, nọ enye ikot edi ufọk Abasi, nọ enye Edisana Ñwed Abasi me ñwed emi ewetde Ikọ Abasi nyũ bọñ akam baña enye. Ndien Abasi eyefiok ete ke afo emesin ukpono Abasi fo ke edinam. Ndien ke afo edikotde Enye, Enye eyebọrọ ete, “Se Mi mi.”

Akpanikọ Me Mbubik

Anditiñ ntiñ-nnim ikọ ọdọhọ ete edieke mmọ ediwutde mbọm ye mfọnido enyũ etua mme ubuene mbọm, ndien Abasi eyenem esit ye mmọ, ndien ke mmọ edifioride ikot Enye, Enye eyebọrọ ete “Se Mi mi.” Abasi esikop akam akpanikọ emi otode owo emi eneñerede oyom uñwam onyũ enyenede mbuotidem ke Abasi.

Yak nnyin iti ite ke Abasi ọdiọñde me nnyin idi mme anam akpanikọ me idighe. Ke nnyin itiñde ikọ inọ Abasi, nnyin ikemeke nditiñ ñkpọ kiet ke ini esit nnyin ekerede ñkpọ efen. Ndusuk ini mme owo esibiaña mmọ efen: nditọ iren ye nditọ iban ekeme ndida andikpep mmọ ke Usen Ọbọñ “enam mbubure” me “ndibre nkari” ye mme ete ye eka mmọ me ndidomo ndibiaña ọkọwọrọ-ikọ. Edi ti ete, ke “Owo ikemeke ndibiaña Abasi.”

Utip Akpanikọ

O, nso utibe-ṅkpọ ke edi owo ndisik ṅkpere Abasi nnyuñ nnyene iñwañ-iñwañ esit ye ekikere nṅọ Enye! Ndien ke owo ọtọṅde edoñ ndiboñ akam, Abasi ọdọḣo ete, “Se Mi mi.” Nnyin ikot ke John 15:7 ite, “Edieke mbufo eduñde Mi ke idem, ikọ Mi onyuñ oduñde mbufo ke esit, ebeñe se eyomde, ndien eyenam enọ mbufo.”

O, emem emi ọyọḣde esit owo emi asaṅade ekpere Abasi! Isaiah ada oruk uwem oro odomo ye iñwañ-ikọṅ emi eduḣde mmọṅ ye idim mmọṅ emi misatke. Andiwet Psalm ọdọḣo ete ke utọ owo oro ebiet eto eke etode ke mben akpa mmọṅ, eke osioṅde mfri esie ke ekem ini; ikọṅ esie inyuñ ikeñeke; ndien kpukpru se enye anamde ọwọḣ usuñ” (Psalm 1:3). Nte afo ukemeke ndikere mbaña iñwañ-ikọṅ Edem Usiaha-Utin ye ndinem utebe flawa, ṅkpri idim eke ewetde ebe, idim mmọṅ emi etode ke esit isọṅ etop ewọḣ, mme inuen eke ekwode, ṅkanare-ṅkanare ṅkpri usuñ ye inuk ye ata emem eke otode Heaven edidu do?

Usen Ọbọṅ

Ntọt efen emi enode ke ukpep-ṅkpọ emi edi ndinim usen Sabbath ke edisana. Kiet ke otu Mbet Duop emi ekenode Nditọ Israel ke ediwak isua mbemiso edisim eyo Isaiah ekedi. “Ti Usen Sabbath nyuñ nim enye ke edisana” (Exodus 20:8). Ema ekabare eda akpa usen urua nte usen ukpono Abasi ke ndo-ndo oro eriset ke mkpa Jesus ama akada itie, kpukpru ata nditọ Abasi enyuñ enim emi ọtọṅde ke ini oro tutu edisim mfin emi. Enye edi usen emi Jesus ekesetde ke mkpa; enye edi usen emi Enye okowutde mbet idem; enye edi usen emi ekenode Edisana Spirit, ke ini emi Ufọk-Abasi akpanikọ ọkọtọṅde; enye edi usen emi mbet ekebonode ọtọ kiet ndibuñ uyo nditi edinam Udia Ọbọṅ ekenyuñ edade mme enọ mmọ esọk Abasi.

Enye edi Usen Ọbọṅ ndien nnyin ikpekpono inyuñ inim enye ke edisana. Kpukpru utom eke midotke, edidedep me edinyanyam ke Usen Ọbọṅ edi ndibiat Usen Esie. Ndika uwat inemesit, ewọk me isañ-ndise ke Usen Ọbọṅ edi ndinam “utom fo.” Edọḣo nnyin ete ke edieke nnyin ikabarede ukot nnyin isio ke edinam utom nnyin ke edisana usen emi inyuñ ikpono Abasi, ndien Enye eyedat esit ke abaña uwem nnyin. Enye ọñwọṅo ete ke Imọ iyenam nnyin “idoro ke edikoñ ebiet isọṅ” kpa nte akwa andikan emi odorode ke edikoñ ukpat-ṅkpọ onyuñ awatde ebe ke mme obot onyuñ okopde inem ke abaña kpukpru nti ṅkpọ ke uwem. Okposuk edi nte ke ekeme ndidu ndusuk ṅkpọ emi anditiene-Christ ekemedede ndiyom, enye ọyuhọ onyuñ enem esit, koro enye enyenede Jesus, ndien eyenọ enye awak akan kpukpru se enye ananade ke usen ke usen. Enye osuk oyom ndinim “inyene” ke Heaven.

Anana Utit Edidiọṅ

Akani enyene mbufiọk owo kiet ke Eti-mbuk ekesiwak nditiñ ke ikọ-ntiense esie ete ke ini Abasi akanyaṅade imọ, ke imọ ima inyene ata inemesit ikan nte ekedide ke akpa: imọ ima isaña isañ ikan, ima isine ọfọṅ eke eyede akan, idia udia emi ọfonde akan inyuñ ikop inem uwem ikan nte ekedide. Ih, ata ediwak ṅkpọ emi efonde ekan ke uwem edu ke ubet unim-ṅkpọ enọ eren, ṅwan, eyenwọṅ eren me ṅka-iferi emi anamde ṅkpọ ọṅọ Abasi ke ofuri esit esie. Edi se isuk ifonde ikan oro edi akwa utip emi anade ebet enye ke Heaven.

Nte afo amama ndinyene inyene? Yom inyene eke Spirit. “Ekam ebemiso eyom Obio Ubọṅ Esie ye edinen ido Esie; ndien eyedian kpukpru ṅkpọ emi enọ mbufo” (Matthew 6:33).

MME MBUME

- 1 Mme anie ke Isaiah eketiñ ikọ ọnọ?
- 2 Mmọ ekewak ndibọñ akam didie?
- 3 Nso ke mmọ ekenam man edomo ndinam Abasi akpañ utọñ ọnọ mmọ?
- 4 Nte afo emekere ete mmọ ekenam akpanikọ?
- 5 Nso idi mme eñwọñọ emi enọde mmọ emi enamde uyo Abasi ke itie ñwed emi?
- 6 Nte afo emekeme nditiñ mbaña ndise emi owutde owo eke okopde uyo Abasi?
- 7 Isaiah ada oruk owo oro odomo ye nso? Nso ke Andiwet Psalm eketiñ abaña oruk owo oro?
- 8 Ewe usen ke ediọñọ nte Usen Ọbọñ?
- 9 Nso idi mme eñwọñọ emi enọde mmọ emi enimde enye ke edisana? (Isaiah 58:14).
- 10 Nọ nta duop emi anamde anditiene-Christ okop inemesit akan anam-idiok.